

Leksyon 7

"ANG ESPIRITU SANTO"



1. Kinsa ang Espiritu Santo?

- Ang Espiritu Santo Dios man. Siya ang ikatulong persona sa pagkaDios nga ginatawag ug Santisima Trinidad. Ang Espiritu Santo gitawag sa laing mga ngalan sama sa: Espiritu sa Dios, Ang Espiritu ni Cristo ug Maglilipay.

Mateo 28:19. Busa panglakaw kamo ug himoa ninyong mga tinun-an ang tanang kanasuran sa pagpamautismo kanila sa ngalan sa Amahan ug sa Anak ug sa Espiritu Santo.

2. Unsaon nato pagkasayud nga ang Espiritu Santo Dios?

- Ang Espiritu Santo sama gayud sa Dios nga Amahan sa tanang pamaagi. Siya walay katapusan, gamhanan sa tanan, nasayud sa tanan ug Siya anaa sa tanang dapit. Siya nagapamuhat kauban sa Amahan ug sa Anak.

Hebreohanon 9:14. Pinaagi sa Espiritu nga dayon mihalad sa iyang kaugalingon nga walay buling ngadto sa Dios.

Salmo 139:7. Asa ba ako paingon gikan sa imong Espiritu? Kon asa ba ako makalagiw gikan sa imong presensya.

1 Corinto 2:10. Kay ang Espiritu nagatugkad man sa tanang mga butang lakip sa mga kinahiladman sa Dios.

Juan 1:32. Ug si Juan nagpanghimatuod nga nag-ingon "Nakita ko ang Espiritu nga mikunsad ingon ug salampati gikan sa langit, ug kini nagpabilin diha kaniya."

3. Sa unang panghitabo imong makaplagan nga ang Espiritu Santo nagapamuhat kauban sa Amahan ug Anak?

- Ang Espiritu Santo nagapamuhat kauban sa Amahan ug sa Anak sa pagbuhat sa kalibutan.

Genesis 1:2, 3. Ug ang yuta awa-aw ug walay sulod; ug ang kangitngit diha sa ibabaw sa nawong sa kahiladman ug ang Espiritu sa Dios naglihok sa ibabaw sa

nawong sa mga tubig. Ug miingon ang Dios: Mahimo ang kahayag: ug diha ang kahayag.

Job 33:4. Ang Espiritu sa Dios nagbuhat kanako, ug ang gininhawa sa makagagahum nagahatag kanako ug kinabuhi.

4. Dinhi na ba ang Espiritu Santo sa kalibutan sa panahon sa Daang Pakigsaad?

- Oo. Ang Espiritu Santo dinhi na sa kalibutan sa panahon sa Daang Pakigsaad? Ug aron sa pagtabang sa mga tawo sa pag-alagad sa Ginoo.

Genesis 6:3. Ang akong Espiritu dili makiglalis sa gihapon sa tawo.

Genesis 41:38. Ug si Faraon nagingon sa iyang alagad, "Makakaplag ba kaha kita ug usa ka tawo nga ingon niini, nga kaniya anaa ang Espiritu sa Dios?"

5. Sa unsang paagi ang Espiritu Santo mitabang kanato sa atong kaluwasan?

- Ang Espiritu Santo nagpaila kanato sa gidak-on sa atong mga sala. Siya mitabang kanato nga dawaton si Jesus ingon nga atong Manluluwas. Gibag-o niya ang atong kinabuhi. Mao kini ang gitawag nga pagkakabig o natawo pag-usab.

Juan 16:8. Ug inig-abot na niya, iyang pailhon ang kalibutan mahitungod sa sala, ug sa pagkamatarung ug sa hukom.

1 Corinto 12:3. Ug walay makaingon, "Si Jesus Ginoo," nga dili pinaagi sa gahum sa Espiritu Santo.

Juan 3:5,6. Sa pagkatinuod, sa pagkatinuod, magaingon ako kaninyo, gawas kong ang tawo iganak sa tubig ug sa Espiritu dili siya makasulod sa gingharian sa Dios. Ang gianak sa unod, unod man ug ang gianak sa Espiritu espiritu man.

6. Nagapuyo ba ang Espiritu Santo sa matag-usa ka magtotoo? Oo, Ang Espiritu Santo mopuyo sa atong kasingkasing sa diha nga makabig na kita.

Taga Galacia 4:6. Ang Dios mipadala sa Espiritu sa Iyang anak nganhi sa atong mga kasingkasing nga nagatuwaw, "Abba"! Amahan!

Taga-Roma 8:9. Ang wala magbaton sa Espiritu ni Cristo dili iya si Cristo.

Taga Roma 8:15,16. Kay wala kamo makadawat sa Espiritu sa pagkaulipon aron mangahadluk na usab kamo, hino-noa maoy nadawat ninyo ang Espiritu sa pagkainanak. Sa dihang nangtuwaw kita sa pagpangamuyo nga magaingon, "Abba"! Amahan. Ang Espiritu gayud mao ang magapanghimatuod uban sa

atong espiritu nga kita mga anak sa Dios.

7. Nabautismohan ba sa Espiritu Santo ang matag-usa ka magtotoo?

- Wala. Apan gikinahanglan gayud sa mga Cristohanon mga mabautismohan sa Espiritu Santo human sila makabig.

Mga Buhat 2:38, 39. Ug si Pedro mitubag kanila, "Paghinulsol kamo, ug pabautismo kamo ang matag-usa kaninyo sa ngalan ni JesuCristo tungod sa kapasayloan sa inyong mga sala; ug madawat ninyo ang gasa sa Espiritu Santo. Kay ang saad alang kaninyo ug sa inyong mga anak ug sa tanan nga atua sa halayo, sa matag-usa nga pagatawgon sa Ginoo nga atong Dios.

ANG IMONG PAGABUHATON

1. Basaha ang San Juan Capitulo 14 ug 16.
2. Sublia pagsag-ulo ang mga Sag-ulohon gikan sa una hangtud sa ika-unom nga leksyon.
3. Kon masag-ulo na nimo pag-ayo ang mga sag-ulohon tubaga ang mga pangutana sa Talaan sa Tinun-an alang sa ika-pitong leksyon.